

ARTIGO 25:

A instalación e retirada dos contedores realizáranse con suxeición á normativa vixente en materia de Carga e Descarga, e, observando as demais normas inherentes que sexan de aplicación, agás orde expresa do Concello.

Unha vez retirado o contedor, a superficie do seu asentamento deberá quedar en perfecto estado e completamente limpa.

ARTIGO 26:

O/a titular da licencia será responsable dos defectos ou deterioros que poida producir no pavimento, quen deberá comunicalo de inmediato á Administración Municipal, facéndose cargo das gastos que a súa reparación orixine.

ARTIGO 27:

A Empresa propietaria dos contedores deberá subscribir unha póliza de seguro que garanta a responsabilidade dos posibles danos causados na vía pública e/ou a terceiros.

ARTIGO 28:

O vertido dos contedores soamente poderá efectuarse nos lugares que a tal efecto teña autorizados a Administración municipal, previa obtención do correspondente permiso, así como o aboamento do prezo público establecido.

Queda terminantemente prohibido o vertido de terras e materiais en todo o termo municipal que non sexa expresamente autorizado polo Concello para dita finalidade.

ARTIGO 29:

Baixo ningún concepto permitirase a utilización dos contedores obxecto da presente ordenanza, sexa cal sexa o seu lugar de instalación, para o vertido e transporte de produtos líquidos ou pastosos, nin aquelas que aínda sendo sólidos poidan ser nocivos, tóxicos, insalubres, perigosos ou perecedeiros.

ARTIGO 30:

As empresas propietarias dos contedores deberán dispoñer dun recinto axeitado para albergar os vehículos e contedores, así como as instalacións adecuadas para o lavado dos mesmos.

ARTIGO 31:

O transporte dos contedores realizarase en vehículos debidamente autorizados e adaptados a tal fin, que disporán dos elementos de suxeición necesarios. O contedor deberá transportarse sempre tapado coa súa lona ou cuberta firmemente suxeito ó vehículo.

ARTIGO 32:

Serán responsables do cumprimento das obrigas establecidas na presente ordenanza, as empresas propietarias dos contedores. X

ARTIGO 33:

Sen prexuízo das responsabilidades de carácter civil ou penal correspondentes, a infracción do disposto na presente ordenanza será sancionada pola Alcaldía con multa de ata 15.000 pesetas; ademais da facultade da Administración municipal de ordenar a inmediata retirada do contedor, se así o estima conveniente; retirada que será efectuada pola propia Administración a costa da persoa interesada, en caso de incumprimento por parte da mesma. X

No caso de reincidencia na comisión de infraccións, en canto ó lugar e forma de efectuar os vertidos, será de aplicación o disposto na Lei 42/1975 de 19 de novembro, sobre refugallos e residuos sólidos urbanos. ✓

ARTIGO 34:

A autorización de instalación dos contedores e a fixación do lugar da súa localización será expedida pola Xefatura da Policía Local, respetando as competencias que correspondan á Alcaldía para concesión de licencias e as que correspondan a calquera outros órganos ou departamentos municipais.

ARTIGO 35:

O correspondente prezo público cobrarase por adiantado de conformidade co previsto na ordenanza reguladora de prezos públicos por aproveitamentos especiais da vía pública.

VI.- ORDENANZA MUNICIPAL DE ZONAS NATURAIS E ESPACIOS VERDES.**Artigo 1:**

Toda a cidadanía ten dereito ó uso e gozo das zonas verdes públicas de acordo co establecido na presente ordenanza e demais disposicións aplicables.

Artigo 2:

Constitúe o obxecto da presente ordenanza a defensa do medio natural e das zonas verdes urbanas no senso máis amplo (implantación, conservación, uso e gozo), que comprende tanto as plantacións realizadas sobre o solo de propiedade municipal como sobre os terreos particulares que estean afectados como zona verde no planeamento urbanístico vixente e os comprendidos no catálogo a elaborar polo Concello e no que constarán as formacións e especies vexetais singulares que polas súas características peculiares de beleza, antigüidade, historia ou rareza, merezan ser conservadas. A/o propietario do terreo non

poderá proceder á supresión de árbores ou plantacións incluídas neste catálogo sen a autorización municipal correspondente. O devandito catálogo deberá ser elaborado polo servizo municipal competente no prazo de 2 anos.

Se con motivo dunha obra, choque de vehículos, canles particulares etc., resultase a árbore morta, danada ou fose necesario o seu traslado, o Concello, a efectos da correspondente indemnización e sen prexuízo da sanción que corresponda, valorará a árbore sinistrada en todo ou en parte segundo as normas citadas polo ICONA no seu "Boletín de la Estación Central de Ecología" vol. IV, número 7.

A presente ordenanza regula tamén o uso dos espazos verdes públicos e os elementos neles instalados así como as plantacións, principalmente de arboredo, existentes nas vías públicas e as prazas da cidade.

Comprende por último a regulación das condicións hixiénicas e fito-sanitarias que terán que cumprir todas as plantacións nos xardíns ou espazos privados.

Artigo 3:

Cando os servizos municipais consideren que determinados xardíns, no seu conxunto ou algúns dos seus elementos, teñen un notable interese botánico, histórico ou de outra índole, poderán propoñer a súa catalogación de conformidade coas determinacións da lexislación urbanística ó respecto.

Artigo 4:

As novas zonas verdes manterán aqueles elementos naturais, como a vexetación orixinal existente, cursos de auga ou zonas húmidas, configuracións topográficas do terreo e calquera outro que conforme as características ecolóxicas da zona, que servirán de soporte ós novos usos, podendo converterse, en casos específicos, en condicionantes do deseño.

Artigo 5:

Verbo da plantación, as novas zonas verdes deberán cumprir as seguintes normas:

- a)- Respetaranse todos os elementos vexetais a que se refire o artigo anterior.
- b)- Escolleranse con preferencia especies vexetais propias do noso contorno.
- c)- Non se utilizarán especies que nese momento estean expostas a pragas e enfermidades con carácter crónico e que como consecuencia poidan ser focos de infección.
- d)- As plantas que se utilicen deberán encontrarse en perfecto estado sanitario, sen golpes nen magulladuras que poidan resultar infectados. O seu tamaño deberá ser axeitado para o desenvolvemento óptimo do vexetal, sen deseque-

librios orgánicos que provoquen enfermidades no mesmo por debilidade do sistema radicular.

Artigo 6:

As redes de servizos (eléctricas, telefónicas, de saneamento, distribución de auga etc.) que teñan que atravesar as zonas verdes deberán facelo de forma subterránea, debidamente canalizadas e sinalizadas.

As redes de servizos públicos non poderán usarse en ningún caso para interese ou finalidade privada. En especial, prohíbese o uso da auga da rede municipal de rega para xardíns de titularidade privada.

Artigo 7:

As árbores e arbustos que integren as zonas verdes serán podados axeitadamente na medida en que a falla desta operación poida supoñer un detrimento no vigor vexetativo, un aumento da susceptibilidade ó ataque de pragas e enfermidades ou un perigo de caída de pólas secas.

Artigo 8:

Todo propietario/a dunha zona verde queda obrigado/a a realizar os oportunos tratamentos fitosanitarios preventivos pola súa conta, en evitación de pragas e enfermidades das plantas desa zona verde.

No caso de que unha praga ou enfermidade se declare nas plantacións dunha zona verde, a ou o propietario deberá dar ás mesmas e ó seu cargo, o correspondente tratamento fito-sanitario no prazo máximo de oito días, debendo, en caso necesario, proceder a suprimir e eliminar as devanditas plantacións de forma inmediata.

Artigo 9:

Os xardíns e zonas verdes tanto públicos como privados deberán encontrarse en todo momento nun estado satisfactorio de limpeza e ornato, así como libres de maleza espontánea, nun grao en que non poidan ser causa de infección ou materia facilmente combustible.

Artigo 10:

As persoas titulares de quioscos, bares etc., que integren nas súas instalacións algún tipo de plantacións deberán velar polo bo estado das mesmas.

Artigo 11:

As obras de apertura de gabias na vía pública, tanto se son para redes ou canalizacións de servizos públicos como para a rede de sumidoiros, así como as de construción de bordos e vaos faranse de forma e nos lugares que ocasionen os menores danos posibles ó arboredo e outras plantacións da vía pública.

En todas estas obras será obrigatorio para as persoas interesadas a reposición das árbores e plantacións afectadas.

A estes efectos esixiráselles, antes de seren concedidas as correspondentes licencias, a constitución dun depósito de garantía polo importe estimado da referida reposición, segundo valoración efectuada polo Servicio de parques e xardíns.

Se este Servicio o estima oportuno, previamente á realización das obras serán trasladadas a outro lugar, a cargo do interesado, as árbores ou outros elementos afectados.

Artigo 12:

Nos proxectos de edificacións particulares, as entradas e saídas de vehículos deberán preverse en lugares que non afecten ó arboredo ou plantacións existentes na vía pública. A este efecto, nos proxectos das obras deberán sinalarse os elementos vexetais existentes na vía pública.

Nos casos en que a norma anterior sexa de imposible cumprimento por razóns das circunstancias de feito concurrentes, os elementos vexetais serán trasladados a cargo da persoa interesada a outro lugar que sexa compatible co uso privado.

Cando excepcionalmente sexa inevitable a supresión dalgunha árbore ou plantación, en compensación ó interese público perturbado, os interesados deberán aboar unha indemnización equivalente ó triple do valor dos elementos vexetais que resulten afectados, segundo valoración do Servicio de parques e xardíns.

Artigo 13:

Pola súa cualificación como bens de dominio e uso público, non poderán ser obxecto de privatización do seu uso en actos organizados que pola súa finalidade, contido, características ou fundamento presupoñan a utilización deses recintos con fins particulares en detrimento da súa propia natureza e destino.

Artigo 14:

Cando por motivos de interese se autoricen nese lugares actos públicos, deberanse tomar as medidas necesarias para que a maior afluencia de persoas ós mesmos non cause detrimento nas plantas e mobiliario urbano. En todo caso, esas autorizacións deberán ser solicitadas coa antelación suficiente para adoptar as medidas precautorias necesarias.

Artigo 15:

Os usuarios das zonas verdes e do mobiliario urbano instalado nas mesmas deberán cumprir as instrucións que sobre a súa utilización figure nos indicadores, anuncios, rótulos e sinais existentes.

En calquera caso, deberán atender as indicacións que formulen os axentes da Policía Local e o persoal municipal competente.

Artigo 16:

Con carácter xeral, para a boa conservación e mantemento das diferentes especies vexetais das zonas verdes, estarán prohibidos os seguintes actos:

- 1.- Toda manipulación realizada sobre as árbores e plantas.
- 2.- Camiñar por zonas axardinadas acoutadas.
- 3.- Pisar o céspede de carácter ornamental, introducirse no mesmo e utilizalo para xogar, repousar ou estacionarse sobre el.
- 4.- Cortar flores, pólas ou especies vexetais.
- 5.- Cortar, apear ou podar árbores situadas en espazos públicos sen autorización municipal expresa.
- 6.- Arrincar ou partir árbores, pelar ou arrincar as súas "cortizas", cravar puntas, atar ás mesmas randeeiras, escaleiras, ferramentas, soportes de andamiaxe, ciclomoteres, bicicletas, carteis ou calquera outro elemento, gabear ou subir ás mesmas.
- 7.- Depositar, aínda de forma transitoria, materiais de obra sobre as sobreiras das árbores ou verter nelas calquera clase de produtos tóxicos.
- 8.- Tirar nas zonas axardinadas lixo, residuos, cascotes, pedras, papeis, plásticos, graxas ou produtos caústicos ou fermentables ou calquera outro elemento que poida dañar as plantacións.
- 9.- Prender lume, calquera que sexa o motivo, en lugares que non estean expresamente autorizados e non teñan instalacións axeitadas ó efecto.

Artigo 17:

Para a boa conservación e mantemento das diferentes especies de animais existentes nas zonas verdes, así como dos lagos e estanques existentes nas mesmas, non se permitirán os seguintes actos:

- a.- Cazar, perseguir ou molestar indebidamente calquera tipo de animal.
- b.- Pescar, inquietar ou causar dano ós peixes, así como tirar calquera clase de obxectos ou refugallo ós lagos, estanques e recintos análogos.
- c.- A tenencia neses lugares de utensilios ou armas destinadas á caza de aves ou outros animais.

Artigo 18:

As e os usuarios das zonas verdes non poderán abandonar nos devanditos lugares especies animais de ningún tipo.

Artigo 19:

Os cans deberán ir conducidos por persoas e provistos de correa, agás nas zonas debidamente acoutadas para eles, circulando polas zonas de paseo dos parques, evitando causar molestias ás persoas, achegarse ós xogos infantís, penetrar nas pradeiras de céspede, nos macizos axardinados, nos estanques ou fontes e espantar ás pombas, paxaros e outras aves.

As persoas que os conduzan coidarán de que depositen as súas dexecións nos lugares axeitados ó efecto e sempre arredados dos de localización de xogos infantís, zonas de nenos etc. En todo caso, deberá estarse ó disposto ó respecto na ordenanza de Limpeza e Residuos Sólidos Urbanos.

A ou o propietario do can será responsable do seu comportamento de acordo coa normativa aplicable.

Queda absolutamente prohibida a permanencia, tránsito ou paseo de cans, cabalos e outros animais polas praias desta cidade.

Artigo 20:

A preservación da tranquilidade e acougo, características propias das zonas verdes, esixe que:

a).-A práctica de xogos e deportes hanse realizar nas zonas especificamente acoutadas cando concorran as seguintes circunstancias:

- 1.- Poidan causar molestias ou accidentes ás persoas.
- 2.- Poidan causar danos ou deterioros a plantas, árbores, bancos e demais elementos de mobiliario urbano, xardíns e paseos.
- 3.- Impidan ou dificulten o paso de persoas ou interrompan a circulación.
- 4.- Perturben ou molesten de calquera xeito a tranquilidade pública.

b).-Os voos de avións de modelismo propulsados por medios mecánicos soamente poderán realizarse nos lugares expresamente acondicionados a tal fin.

c).-As actividades industriais restrinxiranse ó máximo, limitándose a venda ambulante de calquera clase de produtos, que soamente poderán efectuarse coa correspondente autorización municipal expresa para cada caso concreto.

A instalación de calquera clase de industrias, comercios restaurantes, venda de bebidas ou refrescos, xelados etc., requerirá autorización ou concesión administrativa do Concello, obtida coa tramitación que a normativa aplicable dispoña en cada caso concreto.

Os concesionarios deberán axustarse estrictamente ó alcance da súa autorización, sendo responsables das súas extralimitacións.

d).- Agás nos lugares especialmente destinados a estes fins, non se permitirá acampar, instalar tendas de campaña ou vehículos a tal efecto habilitados, practicar camping ou establecerse con algunha destas finalidades, calquera que sexa o tipo e tempo de permanencia.

Artigo 21:

Nas zonas verdes non se permitirá:

- a).-Lavar vehículos, roupas ou proceder ó tendido delas e tomar auga das bocas de rega.
- b).-Efectuar inscricións ou pegar carteis nos peches, soportes de alumeamento público ou en calquera elemento existente nos parques e xardíns.
- c).-Instalar calquera tipo de modalidade publicitaria nos parques catalogados. Nas restantes zonas verdes só se autorizarán elementos publicitarios previamente homologados polo Concello.
- d).- Realizar nos seus recintos calquera clase de traballos de reparación de automóbiles, albanería, xardinería, electricidade, etc.

Artigo 22:

A entrada e circulación de vehículos nos parques será regulada de forma específica e concreta para cada un deles mediante a correspondente sinalización que a tal efecto se instale nos mesmos.

Artigo 23:

As bicicletas e motocicletas só poderán transitar nos parques, prazas ou xardíns públicos, nas calzadas onde estea expresamente permitida a circulación de vehículos e naquelas zonas especialmente sinalizadas ó efecto.

O estacionamento e circulación destes vehículos non se permitirá nos paseos interiores reservados para os paseantes.

Os nenos/as de ata 10 anos poderán circular en bicicleta polos paseos interiores dos parques sempre que a escasa afluencia de público o permita e non causen molestias ós demais usuarios do parque.

Artigo 24:

Os vehículos de transporte non poderán circular polos parques, agás:

1º.- Os destinados ó servicio dos quioscos e outras instalacións similares, sempre que o seu peso non sexa superior a tres toneladas e nas horas que se indique para o reparto de mercancias.

2º.- Os vehículos ós Servicio do Concello de Vigo así como os dos seus provedores debidamente autorizados polo propio Concello.

Os autocares de turismo, excursións ou colexios soamente poderán circular polos parques e xardíns públicos e estacionarse neles nas calzadas onde estea expresamente permitida a circulación deses vehículos.

Os vehículos de inválidos que desenvolvan unha velocidade non superior a 10 Km/h poderán circular polos pasos peonís dos parques e xardíns públicos.

Os vehículos propulsados por calquera tipo de motor e que desenvolvan unha velocidade superior á indicada anteriormente non poderán circular polos parques e xardíns agás nas calzadas onde estea expresamente permitida a circulación de vehículos.

Artigo 25:

O mobiliario urbano existente nos parques, xardíns e zonas verdes como bancos, xogos infantís, papeleiras, fontes, sinalizacións, farolas e elementos decorativos (adornos, estatuas etc.) deberán manterse no máis axeitado e estético estado de conservación. Os causantes do seu deterioro ou destrución serán responsables non só do resarcimento do dano producido senón que serán ademais sancionados administrativamente de conformidade coa falta cometida.

Así mesmo serán sancionados os que facendo un uso indebido deses elementos prexudiquen a boa disposición e utilización dos mesmos. A tal efecto establécense as seguintes limitacións:

A).- Bancos:

Non se permitirá o uso inadecuado dos mesmos, arrincar os que estean fixos, trasladar os que non estean fixadaos ó chan, agrupar bancos de forma desordenada, realizar comidas sobre os mesmos de xeito que poidan manchar os seus elementos, realizar inscricións ou pinturas sobre eles e calquera acto contrario á súa normal utilización ou que prexudique ou deteriore a súa conservación.

As persoas encargadas do coidado dos nenos e nenas deberán evitar que estes, nos seus xogos, depositen sobre os bancos area, auga, barro ou calquera elemento que poida ensucialos ou manchar ós usuarios dos mesmos.

B).- Xogos infantís:

A súa utilización realizarase polos nenos con idades comprendidas nos sinais ó efecto establecidas, non permitíndose a utilización dos xogos infantís polos adultos ou por menores de idade superior á que se indique expresamente en cada sector ou xogo, así como tampouco a utilización dos xogos en forma que exista perigo para os seus usuarios ou poidan deterioralos ou destruílos.

C).- Papeleiras:

Os desperdicios ou papeis deberán depositarse nas papeleiras a tal fin colocadas.

Os usuarios deberán absterse de toda manipulación sobre as papaleiras, movelas, envorcalas e arrincalás, así como de facer inscricións nas mesmas, adherir pegatas ou outros actos que menoscaban a súa presentación.

D).- Fontes:

Os usuarios deberán absterse de realizar calquera manipulación nas cañerías e elementos da fonte que non sexan as propias do seu funcionamento normal, así como a práctica de xogos nas fontes de beber.

Nas fontes decorativas, chafarices, bocas de rega etc., non se permitirá utilizar a auga das mesmas, bañarse ou introducirse nas súas augas, practicar xogos e manipular os seus elementos.

E).- Sinalización, farolas, estatuas e elementos decorativos:

Verbo destes elementos do mobiliario urbano non se permitirá trepar, subirse, arrandearse ou facer calquera acción ou manipulación sobre os mesmos, así como calquera acto que os ensucie, prexudique ou deteriore.

RÉXIME DISCIPLINARIO

Artigo 26:

Calquera persona natural ou xurídica poderá denunciar as infraccións a esta ordenanza en relación coas zonas verdes.

As denuncias, nas que se exporán os feitos considerados como presuntas infraccións, darán lugar á incoación do oportuno expediente, debéndose comunicar a súa resolución ás persoas denunciante.

Artigo 27:

Terán a consideración de infraccións administrativas as accións e omisións que contraveñan o disposto na presente ordenanza.

As infraccións clasifícanse en leves, graves e moi graves consonte se determina nos artigos seguintes:

Artigo 28:

Considéranse infraccións leves:

1.- Deteriorar os elementos vexetais, atacar ou inquietar ós animais existentes nas zonas verdes ou abandonar nas mesmas especies animais de calquera tipo.

2.- Circular con animais (cans, cabalos etc.) por lugares non autorizados e, en particular, polas praias.

3.- Practicar xogos e deportes en sitios e forma non axeitada.

4.- Usar indebidamente o mobiliario urbano.
 5.- As deficiencias de conservación de zonas verdes en aspectos non tipificados como infraccións de maior gravidade.

6.- As deficiencias na limpeza das zonas verdes.

Artigo 29:

Terán a consideración de infraccións graves:

1.- A reincidencia en infraccións leves.
 2.- A implantación de novas zonas verdes con contravención do disposto nesta ordenanza.

3.- As deficiencias na aplicación de tratamentos sanitarios coa debida dosificación e oportunidade.

4.- Cando as plantacións que se atopen dentro da influencia dos concesionarios de quioscos, bares etc., presenten síntomas de teren sido regados con auga con deterxentes, sal ou calquera outro produto nocivo. Se estas anomalías ocasionasen a morte das plantas deberán ademais custear a plantación doutras iguais.

A reincidencia nesta falta pode mesmo ocasionar a anulación da correspondente concesión.

5.- As deficiencias na limpeza das zonas verdes cando produzan accidentes ou infeccións.

6.- A apertura incorrecta de zanzas segundo o establecido na presente ordenanza.

7.- Destruír elementos vexetais ou causar danos ós animais existentes nas zonas verdes.

8.- Practicar sen autorización as actividades a que se refire o artigo 20 desta ordenanza, a non ser que pola súa menor importancia poidan ser cualificadas como leves.

9.- Usar bicicletas en lugares non autorizados.

10.- Causar danos ó mobiliario urbano.

Artigo 30:

Terán a consideración de infraccións moi graves:

1.- A reincidencia en infraccións graves.

2.- Que a acción ou omisión infractora afecte a plantacións que estivesen catalogadas como de interese público.

3.- Que o estado dos elementos vexetais supoña un perigo de propagación de pragas ou enfermidades ou entrañen grave risco para as persoas.

4.- A celebración de festas, actos públicos ou competicións deportivas sen autorización municipal.

5.- Usar vehículos de motor en lugares non autorizados coma motocicletas de trial ou motocros, vehículos todo terreo, etc..

Artigo 31:

Sen prexuízo de esixir, cando proceda, a correspondente responsabilidade civil ou penal, as infraccións ós preceptos desta ordenanza serán sancionadas do seguinte xeito:

a).- As leves, con multas de 1.000 a 5.000 pesetas.

b).- As graves, con multas de 5.001 a 10.000 pesetas.

c).- As moi graves, con multas de 10.001 a 15.000 pesetas.

Artigo 32:

En todo caso, os danos causados nos bens de dominio público deberán resarcirse adecuadamente.

Artigo 33:

A contía das sancións graduarase tendo en conta a gravidade do dano realizado, a intencionalidade, reincidencia e demais circunstancias concorrentes.

Entenderase que incorre en reincidencia quen tiñese sido sancionado por unha infracción ás materias desta ordenanza durante os doce meses anteriores.

Artigo 34:

A ordenanza deberá ser revisada unha vez desenvolvida a "Estratexia para a conservación do medio natural de Vigo".

VII.- ORDENANZA MUNICIPAL DE RUÍDOS E VIBRACIONES.

TITULO I

DISPOSICIONS XERAIS

INTRODUCCION

O ruído é unha das perturbacións ambientais que de xeito máis importante afectan ás persoas, proba disto é o aumento de denuncias por parte dos cidadáns, motivo polo cal se desenvolveu esta ordenanza cos obxectivos de regular a actuación municipal en orde á protección das persoas e dos bens contra das agresións producidas pola enerxía acústica nas súas manifestacións máis representativas, os ruídos e vibracións, e a aportación de solucións medioambientais operativas e de control.

ARTIGO 1

1. A presente ordenanza ten por obxecto regular a actuación municipal en orde á protección das persoas e dos bens contra as agresións producidas pola enerxía acústica de ruídos e vibracións.

2. Os efectos da presente ordenanza, os ruídos e as vibracións entenderanse comprendidas dentro dos elementos contaminantes da atmósfera por formas de enerxía aludidos no artigo 1 da Lei de Protección do Ambiente Atmosférico.

ARTIGO 2

1. Quedan sometidas ás prescricións establecidas nesta ordenanza, de obrigatoria observancia en todo